

AENTSU NINIURIN CHICHAME MASHINIU AMIKTIN

Yánkuam 10, 1948 uwítin, Naciones Unidas-num núkap aents tuókar, kókaram chichaman amíktinian etsérkaru ainiawai. Jú chichaman yajá nunkanam aújas nekawar, etsérkar, aujmatstsar iniankókiarat tusar najánawaru ainiawai. Tura aentsank. uchi unuimiainiana ausha, aentsu chichame étserkamwana aún achikiar aujsar, unuimiarar nekawar nii pujamuri umintikiarat tusar. Tura aentsank yajá nunka tepakmanumash mash jú papin nekawar, etsérkar, paón ajásma atí tusar. Tuma asantai nukap aents tuakar, jú chichaman yajá nunka. etserkamu atí tusar ejéraru ainiawai.

JUÁRMA

Aents yajauch chichaman waintsuk ankón pénker pujustin ainiawai. Yajá nunkanam . aentsu chichame etsérkamu mashi paórlt ajástin ainiawai. Shuar chíkich aentsjaish nuamtak métekkarak iísma atin ainiawai.

Aentsu chichame pénker etsérkachma, nekáchma asantai, shuar wishikkramu, asútiamu, eméskamu, awáttram, yajaúch amákma ainiawai. Tuma asantai yamaikia ukúnma aí aents nuómtak nunkanam pénker asutiachma, waíttcha pujúsat tamaiti.

Aents yajauch nétse áinis enentaimin, aentsu chichame mashiniu amiktin, kókaram papinium áarma arantukma tama awai.

Yajá nunka tepakmanumash ii shuarijiaish pénker nekaniar, arántunaikiar pujustin tamaiti.

Naciones Unidas-num aents anaikiamu ainia aú iruntrar, aents métekkarak armí tusar papinium áarra útsukaruiti. Aentsan aishman, nuajaish métek emkiar, takakmakiar, weenak, ankan penker pujusarat pujusarti tiaruiti.

Yaja nunkania ainiana au, Naciones Unidas-num irunar chichaman juki wenana aú, yaintai tiaru ainiawai. Shuara chichame mashi nekówar amikiarat tiaruiti.

Aentsu chichame mashiniu amiktin, papinium paónt kókaram áarma asantai, mash nekawar amikiartitiaruiti.

MASH AENTS TUÁKAR AÚJMATISAMU

Júna étserieawai

Aentsu Niniurin Chichame Mashiniu Amiktin

Aentsu chichame mashiniu amíktin etsérkamu asantai, Naciones Unidas-num aents irutkamunmania, mátsatkamunmania tuókar, jú chicham pénkér amikiarat tusaraujmatstsar etsérkaru ainiawai. Ashi aents takakmainiana ausha ju chichaman nekówar unuiniaki, etsérkiar weénawai. Kókaram chicham árman, ju nunkanam tura yajá nunkanmash arantukar amikiarat timiaiti.

TÁMA CHIKÍCHIK

Aents yajá nunkanam akínia asamtaish, metekrak ainiaji. Tumasha ni chichamenka tuke amiktin ainiawai. Ni iniakmamuri, ní chichamejaituke aniakmamsar chichakartin ainiawai. Tuma asantai aents mash nekawar, penker metekrak, nuamtak wará warat shiir pujusarmi tusar áarma awai.

TÁMA JÍMIAR

Mash nunkanmania aents matsatka aínia aú, jú papi kókaram aarma, nii amikiartin tama etsérkamuiti. Tura nua, aishmankash, nii chíkich yuúsrin takakiatsha; yajá nunkanmania áchitkiaitiat, chikich aentsjaish apatkar iyamka metekrat ainiaji. Aents chíkich aentsjai páchitkiaitiat, niisha kuitia takakchaitiat, turuskesh takakuitiat, yajá nunkanam akiniaitkiusha chikich aetnsjaish métekrak ainiawai. Tuma asamtai aents nisha iirka akush juú nunkanam pujátikia, penker pujúsar, kókaram papi aárma ána aún tukeumiktiniaitji.

Nunisan aents mash nunkanam niisha pujuinia ausha, ni uúntrin umirin asar, maónitsuk, ankán penker pujusarat tusar jú papi aarman umikiartinaiti.

TÁMA MENAÍNT

Aents niisha yajania akusha tuke jú papinkia amiktin ainiawai. Tura pénker ankan pujustin, kajernaitsuk, awatnaitsuk pujusartin ainiawai.

TÁMA AÍNTIUK

Aents tí iniátai, waítkiatia, tií takákmartiktai, aents surútai, aíniana aúka najashtin tama kókaram papi aárma awai. Tura aents nísha pénker puja anónkar, yajá nunkanam jukír surúkchatnuiti. Tura shuará muúke tsupikiar surukchatnuiti.

TÁMA EWEJ

Aents aínia au nónkamsar awattrashtiniaiti. Tura waítkiasar apújsashtiniaiti. Tura chíkich shuar tunamaru aínia ausha wishikrar, usúkiar, misú ukuinkiar natsánmai ekamsachminiaiti.

TÁMA UJÚK

Aents chíkich ainia au, waitmenmai amajainia wainkiurkia uunt ainia au wárik ujákartiniaitji. Kókaram chichamjai asutiawarat tusar, tura nuyá ayampruktin awai.

TÁMA TSÉNKENT

Kókaram chicha m juamunmaka, aents mash métek akiniawaru asamtai yaimkiartiniaiti. Aentsu awátin, waitmenmai amajainiakuinkia uúnt anaikiamu élinia aú, jú chichaman uminiachkui asútiamu aórtiniaiti. Aents chíkich aentsun, kajéreak shainch iís ajakuinkia; wijiainkia metékchaitme takuish; aentstikia chíkich aentsjaish métek asar ayamrumaktiniaitji.

TÁMA YARÚSH

Mash aents amia aú, kókaram chicham .iwiartainiam, waúmak yaimiainiachkuinkia, aents kajértsuk, kakóram chichaman umikiarat tusar yainkiartiniaitji.

TÁMA USÚMTAI

Aents nónkamas weka wainkiursha, aóntar achikiar sepunam enkeachminiaiti. Tura nónkamsar níí nunkénia, níí mátsatkamurinia yajá nunkanam jukishtiniaiti.

TÁMA NÁWE

Chíkich aents akuisha, kókaramchichamjainkia metékkarakainiawai. Tuma asamtai aents nankamsarkia sepunam enkeachminiaiti. Tura nankamsarkia ni matsatkamurinia, irutkamurinia enkémar yajá nunkanam jukichminiaiti.

TÁMA NÁWE CHIKÍCHIK

Aents chíkich aentsun antar kasámka wainkidchiat, waúrkir kasarrikayi tichatnuitji. Kasámka wainkia asarkia, aents uúnt anaikiamu ekétu ujaktiniaitji. Chíkich aents umitmakun, níí aentsri iniamrasha aminiaiti. Núna pénker nekamí tusar áya úntak unták iruntrar iwiaratin ainiawai. Tura nii shuari ii chichamejai chicharak ayamrakuinkia anturkatin ainiawai.

Ekuatura uuntri kókaram papi aárma iisar umikiartin ainiawai. Aents tunaku, nu papijiai sepunam urútma nantua pujustata, kuitniasha urútmana akikmaktinait tusar nu chicham pénker nekatin ainiawai. Ekuatura uuntri kókaram papi aárma, aents umitsuk nankamas nukap tsawant .sepunam eneachminiaiti, aentsank nónkamsar núkap kuit akikmakta tusarkia aents anankashtiniaiti.

TÁMA NÁWE JÍMIAR

Aents aántar, chikich shuaran jeén nankamas waniachminiaiti. Tura aentsan óntar níí jeén enkéma níí imiatkinrin takaschatnuiti, tura entrar waintiuar awatchatnuiti. Tura tsanumashtiniaiti. Aentsank waít chichamnasha etsérkenikia wekaishtinaiti. Nuna tura Ekuatura untri wainkiunka kókaram chichanijai jú aentsun asútiatnuiti.

TÁMA NÁWE MENÁINT

Shuar nánkamas ni nunkenchu wekasashtiniaiti. Tura aents tui pujustiniait nunasha ninki wakeruk jui pujustatjai titiniaiti.

Aents ni nunkenia jinki, yaja nunkanam pachitsuk weminiaiti. Tura nú aents, ni nunke waketkitiaj takunka, uyumatsuk waketkitnuiti.

TÁMA NÁWE AÍNTIUK

Aents ainia au nankamas chíkich aents kajerkamka, ni nunkenia jinki chikich nunkanam pachitsuk weminiaiti. Jú aentska yajá nunkanam pujústaj takunka ni wakeramu tsawantin, uwitin pujusminiaiti.

Aents níísha yajá nunkanam wétasa puja, turuskesh weá, itiurchat chi.cham jurúkchamniaiti. Chicham Naciones Unidas-num ejéramu aá asamtai.

TÁMANÁWE EWÉJ

Aents ni nunké akinia asa, tuke nú nunkanam achitkia atiniaiti. Tumaasamtai Ekuatura untri tuké yainma atiniaiti.

Aents ni nunke akinia, chikich nunkanam wetaj tau itiurchat amasachminiaiti, tumaitkuish chikich nunkanam pujustaj tusa wakera suritkiashtiniaiti.

TÁMA NÁWE UJÚK

Aeshman natsa, nua natsa ainia aú, pachitsuk ni aents wakeramurijai nuatnaik turuskesh, nuatak pujusminiaiti. Inkish tura tarimiat aents akusha, chikich aents ARÚTMAM- (Dios) enentaimtin akusha, yajania. nunka pachikia akusha, pachitsuk nuatak, nuatnaik ni shuarijiainajónairar pujusminiaiti. Tura aentsank ajapnaiyataj takusha pachitsuk ajapnayaimnia ainiawai.

Aeshman, nuajai mae wakerunai ajasar nuatnaikiarmin ainiawai. Nua, aeshman imian nuútak, nuatnaik pujusachmnia enentaimkiunka turachminiaiti, áyatkish tsanink

pujúsminiaiiti.

Aents nuatnaik nuwen, uchirin takakuka, irutkamunam, matsatkamunam paan ajarar
pujusartiniiaiiti, tuma asamtain Ekuatura untrinkia chicham yajauch akuish pachitsuk
ayamrutinówai.

TÁMA NÁWE TSÉNKENT

Aents ni jeen sumáku asa, ni nérentin atiniiaiiti. Jeán, aján takakuinkia niniuk
atiniiaiiti, tumaitkush matsatkamunmash, initkamunmash chikich aentsjai irunar
takákmasaruitkuinkia niniu ainiawai.

Aentsu jeéncha, twra ajarincha, warín áchat mash niniu asarmatai, aántrar núka atánkir
aents jurúkchatnuiti tama aórma ówai.

TÁMA NÁWE YARUSH

Aents pachitsuk ni wakeramun, ánkan enentaimin aótiniaiiti, tura niísha ARÚTMARIN
enentaimtin árhliniaiiti. Tura pachitsuk ni ARÚTMARIN, ni enentai yapajia, ankan pénker
pachitsuk pujusmin ainiawai. Nuna turuiniakuinkia úmas turúskesh paánt ajásar warinkish
ARÚTMAN wararsamnia ainiawai.

TÁMA NÁWE USÚMTAI

Aents ni enentaimmian, ishamtsuk chikich aetns ainia aún ujaktin ainiawai. Tura
aentsank chikich aents ainia au, metekrakka enentaimin ainiatsui, tumaitiak itiurchat
aents chichaku asarmatai, itiurchat amasashtiniiaiiti. Chicham pénker nekar tuinkish
etsérkamu atiniiaiiti ishamtsuk.

TÁMA NÁWE JÍMIAR

Aents maónitsuk pénker pujuinia shiir awajsar yainkiar iruntrar nuamtak pénker
pujustiniiaiiti.

Turasha aents irunar nuómtak tsanink pujustajtsa nakitia, antrar utsukchatnuiti.

TÁMA NÁWE JÍMIAR CHIKÍCHIK

Mash aents Ekuatura untri chichame etserkui, umirkatnuitji. Ekuatura untri, aents anaík
takákma tusa apújsamujai pénker iruntrar takakmastiniiaitji.

Aents Ekuaturnum pachitkia asa tuinkish pachiniaik takakmastiniiaiiti.

Aents ni aentsrijiai, anaik ekentsamu, Ekuatura untri arantuktiniiaiiti. li aentsri
anaikiar ekemtsami tusarkia, papinium ajaptainiam anaikiar, ekentsamu atiniiaiiti.

TÁMA NÁWEJÍMIAR JÍMIAR

Aents mash ankón uyúmatsuk pénker enentaïmsar pujusarat tusar, Ekuatura untri ii
aentsri yaintiniiaiiti. Chikich nunkanmaya uunt anaikiamu akusha, Ekuatura uuntri
pachitsuk yainkiartin ainiawai.

TÁMA NÁWE JÍMIAR MENAÍNT

Aents ni takátan wakérak emkéma takakmasminiaiiti. Chikich aents takákmana aentsank
niisha métek iísma atiniiaiiti. Uchi takákma puja ajápamu akuish tuke ayámrukma
atiniiaiiti.

Aents nuwa, tura aishman akusha chikich aentsjai métek íisma atiniaiti. Aents nakitrar muijkiamu achatnuiti.

Aents ni aijiai métek takókma puja, kuit métek 'akikma atiniaiti. Waras kuitiah achik ni nuwen, ni aishrin, ni uchirin pushi sumarak, apatkun sumarat ayurat tusar. Ni aentsrijai pénker irunar, wórás wariniaksha sumak yuawarat tusar. Nuna Ekuatura uuntri ayamruktiniaiti.

Ni matsatkamurin, ni irutkamurin aents iruntrar, ni nunkén tesawar achikman ayamrumakar pénker pujúsaratusar, chicham jurúkmiá ówai.

TÁMA NÁWE JÍMIAR AÍNTIUK

Aentsun tuke takókmas ayamratin tama ówai. Tura tsawant ankón akuish tuke ayamratin ainiawai. Ni wakéramun takókmasar, ayamratin ainiawai, tura ankántan jusar tuinkish wear ayamratin ainiawai.

TÁMA NÁWE JÍMIAR EWÉJ

Aents tsukamtsuk, entsatairinha tuke taku, ni jeé pujutairi ankan pénker pujusartiniaiti. Sunkúrmaku akusha tsuamatainiam weér tsuakan sumakar tsuamartin ainiawai. Yurumtainiash tuke takóku ártiniaiti. Aentsan aents takatnum ajápamu akuish Ekuatura untrinkia tuke ayamruktin atiniaiti. Aents tunamar jádkuish, sunkúrmak pujakuish, wajema pujakuish, untach ajas pujakuish, tura warinkish ni pujamurin eménkakmataish túke ayamrumakma atiniaiti.

Nuwa ajamtin, tura uchi kuir ainiana ausha, pénker yainma atiniaiti. Uchi takusar ajapamu akuish, Ekuatura untrin ayámrukma atiniaiti tama áarma ówai.

TÁMA NÁWE JÍMIAR UJÚK

Uchi kuér ainia aú tuke unuimiatainiam unuimiartin ainiawai. Uchi unuimiartinkia kuitchaiti, Ekuatur yaimiu asamtai. Uchikia mash tuke unuimiartin ainiawai, Ekuatura untri útsua asamtai. Aentsan natsasha nuú nankómas unuimiarmin ainiawai. Ninki kakóram ajasar unuimiarartin ainiawai.

Aents unuimian emtikia, nuú arón nankómaki unuimiaki weón yayówai. Tura jú aentska tumaki weak warinkish nekaki, pénker chikich aentsjaish irunar amikrnanaiki wetin ainiawai.

Apawach, nukuach ainia aúka, ni uchirin níí wakeramu unuimiarat tusar utsuktin ainiawai.

TÁMA NÁWE JÍMIAR TSÉNKENT

Aents ni pu]ustinrin, ni nekatairin, iis pénker pujustaj tau tuinkish pachinaik irunar pénker pujusmij taun útsukma atiniaiti. Tura aents mash iruntrar emkatin enentai achikiar, ará arant unuimiarar, emkatin enentai achikiar pujustin ainiawai.

Aents imiatkinia najónan, chikich aents níí najóna aitkiash jukichminiaiti, nuna Ekuatura uuntri tuke ayamrukma atiniaiti.

TÁMA NÁWE JÍMIAR YARUSH

Kókaram papi jui aarmaka, mash ju nunkanam pujati tuke umiktiniaitji. Wari Ekuaturnum tura yajónunkanam aents tuókar jú papin pénker árraru asamtai.

TÁMA NÁWE JÍMIAR USÚMTAI

Aents mash iruntrar ankan pénker enentaïmsarpujusarmi tusar, uunt anairamu matskamuham pujuinia yainma atiniaiti.

Aents ainia au ankan pénker pujusarmi tusar wakeriniaka, chikich aents ainia aujai kajernaitsuk, manitsuk pujusartin ainiawai. Tuma asamtai mash iruntrar métek pujuiniak, Ekuatura uuntri kókaram papi arman umikiartin ainiawai.

Aents mash ankán pénker pujúsarmij tusar wakeruiniaka, ju kókaram papi arma tuke umikiartin ainiawai.

TÁMA MENAINTIU NÁWE

Ju kókaram papi arman nekówaru asar aents túke umikiartin ainiawai. Aents junanekawar, ankán pénker pujusarat tusar, uunt chikichkimsar surimkiartiniaiti. Tura chikich aents ainiana ausha nunaká surimkiachartin ainiawai. Jú kakaram chicham apipium aarman mash aentstikia umikiartin ají.